

Nafarroako Foru Komunitatearen aldeko legezko oinordetzaren gaineko araubidea eguneratzeari buruzko foru legearen aurreproiektua.

## AURKIBIDEA

1. artikulua. Nafarroako Foru Zuzenbide Zibilar buruzko Konpilazioaren 304. Legearen 7. idatz-zatiaren aldaketa.

2. artikulua. Nafarroako Ondareari buruzko apirilaren 4ko 14/2007 Foru Legearen 24. artikuluko 5. idatz-zatiaren aldaketa.

3. artikulua. Nafarroako Ondareari buruzko apirilaren 4ko 14/2007 Foru Legearen 24. artikuluen aldaketa, 6., 7., 8. eta 9. idatz-zatiak gehitzeko.

## XEDAPEN IRAGANKORRA

Bakarra. Foru lege honek indarra hartzen duenean hasiak diren prozeduretan aplikatu beharreko arauak.

## XEDAPEN INDARGABETZAILEA

Bakarra. Indarrik gabe uzten diren xedapenak.

## AZKEN XEDAPENAK

Lehenengoa. Foru lege honek gehiengo osoa behar du onetsia izateko.

Bigarrena. Nafarroako Gobernuari ahalmena ematea.

Hirugarrena. Foru legeak indarra hartzea.

## ZIOEN AZALPENA

Gaur egun, Nafarroako Foru Komunitatearen aldeko legezko oinordetza Nafarroako Foru Zuzenbide Zibilar buruzko Konpilazioa onetsi zuen martxoaren 1eko 1/1973 Legearen 304. eta 307. legetan, Nafarroako Ondareari buruzko apirilaren 4ko 14/2007 Foru Legearen 24. artikuluan, eta haren erregelamenduzko xedapenetan, zehazki Foru Komunitatearen aldeko legezko oinordetzari aplikatu behar zaion administrazio araubideari buruzko uztailaren 1eko 166/1988 Foru Dekretuan.

Nafarroako Foru Eraentza Berrezarri eta Hobetzeari buruzko abuztuaren 10eko 13/1982 Lege Organikoaren 48.2 artikulua xedatzen duenez, Nafarroako Foru Zuzenbide Zibilar buruzko indarreko Konpilazioaren edo Nafarroako Foru Berriaren aldaketa foru lege bidez egingen da. Lege organiko horren 45.6 artikulua ezarri zuen foru lege batek arautuko dituela Nafarroaren ondarea nahiz haren administrazioa,

defentsa eta zainketa. 20.2 artikuluan xedatzen denez, berriz, lege organiko horretan berariaz aipatzen diren foru legeak onesteko, gehiengo osoaren aldeko botoa jaso beharko du proiektu osoari buruzko azken bozketan; horrelako legeak dira, hain zuzen ere, foru lege honen bidez aldatu nahi diren bi xedapenak.

Foru lege honen arrazoia Borondatezko Jurisdikzioari buruzko uztailaren 2ko 15/2015 Legea berriki onetsi izana da, Administrazio Publikoen Ondareari buruzko azaroaren 3ko 33/2003 Legearen zenbait artikulua aldatu dituelako; horren ondorioz, Administrazioa abintestato jaraunse deklaratzeko prozedura, orain arte epaitegiei zegokiena, eremu administratibora eraman behar da, bai eta prozedura horien emaitza den jaraunspeneko ondasunen likidazioa eta xedea arautzen zituzten Kode Zibilaren aginduak ere.

Era berean, uztailaren 2ko 15/2015 Legeak testu berria eman dio azaroaren 3ko 33/2003 Legearen azken xedapenetako bigarrenari, Konstituzioaren 149.1 artikuluan araugintzarako eskumenak banatzeko aurreikusitako sisteman onartu diren aldaketak gehitzeko. Horrenbestez, foru lege honetan bildutako agindu batzuek oinarritzko legeriatzat hartzen den estatuko araudia errepikatzen dute, legeria zibilaren eta foru legeriaren gaineko eskumen autonomikoaz baliatuz erregulazio berekia izan dezaketean aginduak, hain zuzen ere, eta Nafarroak, bere foru eraentza dela eta, dituen eskumen eskusiboez baliatzeari atxikita dauden aginduak.

Adierazitakoarekin bat, foru lege honek Nafarroako Foru Komunitatearen aldeko legezko oinordetzaren gaineko araubidea eguneratzen du, eta, horrela, abintestato jaraunsearen deklarazioak bide judizialek gauzatzen den prozedura izateari utzi, eta prozedura administratibo bihurtuko da. Apirilaren 4ko 14/2007 Foru Lege indardunak antzeko aginduak jasotzen ditu beste kasu batzuetarako; horrekin bat, eta edukiari arau babes egokia emateko xedez, prozedurarako zenbait xedapen ematen ditu, besteak beste alderdi hauek arautzen dituztenak: ebazteko eskumena, publizitatearen baldintzak eta moduak, instrukzioan egin beharreko ekintzak, ebazteko gehieneko epea eta deklarazio administratibo horrek dituen edukia eta ondorioak ondasun eta eskubideen likidazioa egin arte.

Jaraunspeneko ondasunen likidazioak emandako zenbatekoari dagokionez, Nafarroako Foru Zuzenbide Zibilari buruzko Konpilazioaren 304. legearen edukia

aldatzen da, eta aurreikusten Nafarroako Foru Ogasunean sartuko dela, interes sozialeko helburuetarako aurrekontuko diru kopuruak handitzeko. Indarreko banaketa, hau da ongintzako, hezkuntzako, ekintza sozialeko edo lanbide erakundeen artean, Nafarroako Komunitatekoen eta udaletakoen artean erdi bana egiten dena, eguneratu egiten du aldaketa honek, kontuan hartuta horrelako erakundeen jardun eremua gero eta handiagoa dela, kausatzaileen mugimenduak eta egoitza-aldaketak herri eta hiri batean baino gehiagotan bizitzan zehar, eta prozesu horietarako erabiltzen diren bitarteko teknikoak eta langileak egokitu behar direla banatu beharreko zenbatekoarekin.

Horrez gain, arau aldaketa hori Foru Komunitateko zergadunek gizarte-intereseko beste xede batzuetarako bideratzen dituzten tributuen ehuneko 0,7aren esleipena arautzen duen ekainaren 5eko 7/2009 Foru Legearen edukiarekin lotzeko, apirilaren 4ko 14/2007 Foru Legearen 24. artikuluari idatz-zati berri bat, 9.a, erantsi zaio, honakoa zehazteko: jaraunspen horien likidazioak eragindako zenbatekoa Pertsona Fisikoen Errentaren gaineko Zergan xede hori hautatzen duten zergadunen kuota osoekin hornitzen den aurrekontuko kontu-sailari gehituko zaio.

Foru lege honek indarra hartu aurretik Nafarroako Foru Komunitatea abintestato jaraunse deklaratzeko hasitako prozedura judizialei dagokienez, xedapen iragankor bakarrak ezartzen du hasieraren datan aplikatzekoa den araudiaren menpe egonen direla. Likidatu eta banatzeko dauden jaraunspenei dagokienez, azkenik, haien tratamendua, xedea eta banaketa bateratzeko helburuarekin, foru lege honek eta haren erregelamenduzko xedapenek arautuko dituztela xedatzen da.

#### **1. artikulua. Nafarroako Foru Zuzenbide Zibilari buruzko Konpilazioaren 304. Legearen 7. idatz-zatiaren aldaketa.**

Nafarroako Foru Zuzenbide Zibilari buruzko Konpilazioaren 304. Legearen 7) idatz-zatiaren testua hauxe izanen da:

“7) Aurreko zenbakietan aipaturiko ahaiderik izan ezean, Nafarroako Foru Komunitatea izanen da oinordeko; horrek, jaraunspenaren ondasun eta eskubideen likidazioa egin ondoren, ateratzen den zenbatekoa Nafarroako Foru Komunitatearen Diruzaintzan sartuko du, interes sozialeko xedeetarako erabiltzen den aurrekontuko kontu-saila handitzeko.”

**2. artikulua. Nafarroako Ondareari buruzko apirilaren 4ko 14/2007 Foru Legearen 24. artikuluko 5. idatz-zatiaren aldaketa.**

Nafarroako Ondareari buruzko apirilaren 4ko 14/2007 Foru Legearen 24. artikuluko 5. idatz-zatiak testu hau izanen du:

“5. Nafarroako Foru Komunitatearen aldeko legezko oinordetza foru lege honek, Nafarroako Foru Zuzenbide Zibilaren arauak eta aplikatzekoak diren arau osagarriek edo erregelamenduzkoek zuzenduko dute.

Nafarroako Foru Komunitateko abintestato jaraunslearen izaeraren deklarazioa bide administratibotik egingen du ondarearen arloko eskumena duen departamentuak, behar bezala justifikatu ondoren oinordetza utzitako pertsonaren heriotza, testamenturik gabeko oinordetza irekitzea bidezkoa dela, eta beste jaraunsle legitimorik ez dagoela frogatuta.

Deklarazioaren espedientea hurrengo idatz-zatietan eta horiek garatzen dituzten erregelamenduzko arauetan aurreikusitakoari jarraikiz tramitatuko da.”

**3. artikulua. Nafarroako Ondareari buruzko apirilaren 4ko 14/2007 Foru Legearen 24. artikulua aldaketa, 6., 7., 8. eta 9. idatz-zatiak gehitzeko.**

Nafarroako Ondareari buruzko apirilaren 4ko 14/2007 Foru Legearen 24. artikulua aldatzen da, 6., 7., 8. eta 9. idatz-zatiak gehitzeko, eduki honekin:

“6. Prozedurari ofizioz emanen zaio hasiera, organo eskudunak erabakita, berak bere ekimenez edo hauen ondorioz: goragoko agindu bat, beste organo batzuen eskaera arrazoitua edo salaketa, edo beste organo, entitate edo profesional batzuegandik jasotako jakinarazpenak.

Prozedura irekitzeko ebazpena Estatuko Aldizkari Ofizialean eta Nafarroako Aldizkari Ofizialean emanen da argitara, eta kausatzaileak azken helbidea izandako toki entitateetara, hil zenekora eta ondasun gehienak zituenekeora igorriko da, bertako iragarki oholetan argitara dezaten, horrek galarazi gabe zabalkunderako beste bitarteko batzuk ere erabiltzeko aukera. Ediktuak hilabetez egon beharko dira jendaurrean, eta

epe horretan interesdun orok alegazioak aurkezten ahalko ditu, edo egokitzen jotzen dituen agiriak edo beste datu batzuk.

Espedientearen instrukzioak berarekin ekarriko du Nafarroako Foru Komunitateko Administrazioaren oinordetza eskubideak bidezkoak direla ezartzeko beharrezkoak diren egintza eta egiaztatzen guztiak egitea, eta kausatzaileaz eta bere ondasun eta eskubideez lor daitezkeen datu guztiak ere barne hartuko ditu. Herritarren laguntza ere eskatzen ahalko da, foru lege honen 54. artikulua aipatutakoa.

Espedientearen txosten juridiko bat ere egonen da, Nafarroako Foru Komunitatea abintestato jaraunse deklaratzeko egindako jarduketan egokitasunaz eta nahikotasunaz, bai eta deklarazioa arautzen duten xedapenen betetzeaz ere.

Espedientearen ebazpena eta, kasua bada, Nafarroako Foru Komunitatearen aldeko abintestato jaraunsearen deklarazioa, departamentuan ondare arloko eskumenak dituen organoak emanen du, eta deklarazioan sartutako ondasun eta eskubideen zerrenda zehaztua ere jasoko du, erabilera edo gozamenerako balizko mugekin eta espedientearen horiei buruz izan daitezkeen aipamen ororekin batera. Prozedura ebazteko gehieneko epea urtebetekoa izanen da, irekitzen den egunetik hasita.

Ematen den ebazpena espedienteari hasiera emateko erabakia argitara eman eta iragarri den toki berberetan argitaratuko da; jaraunspeneko ondasunen gaineko esku-hartez arduratzen ari diren organo judizialei haren berri emanen zaie eta jaraunspenerako eskubidea izan lezaketenei jakinarazi beharko zaie.

Nafarroako Foru Komunitatea abintestato jaraunse deklaratzeko prozedura honetan emandako egintza administratiboaren kontrako errekurtsioa aurkezten ahalko da administrazioarekiko auzien jurisdikzioan, soilik eskumenean eta prozeduraren gaineko arauak hausteagatik, eta, betiere, bide administratiboa amaitu ondoren. Administrazioa abintestato jaraunse deklaratzeko edo haren alde ondasunak adjudikatu izanak beren jaraunspenerako eskubidea edo beste eskubide zibil batzuk kalteatu dituela uste dutenek dagozkion ekintzez baliatzen ahalko dira organo jurisdikzional zibiletan, bide administratiboan erreklamazioa egin ondoren, Nafarroako Foru Komunitateko Administrazioari buruzko abenduaren 3ko 15/2004 Foru Legearen 61. artikuluan eta Herri Administrazioen Araubide Juridikoari eta Administrazio Prozedura Erkideari buruzko azaroaren 26ko 30/1992 Legearen VIII. tituluaren ezarritako arauarekin bat.

7. Nafarroako Foru Komunitateari abintestato jaraunsearen izaera emateko deklarazio administratiboak berarekin dakar jaraunspena inbentario-emaitzaren arabera

onartzea, kausatzailearen ondasun eta eskubideen jabetza hartzea ahalbidetzen du, eta, kasua bada, eskubidea ematen du aginte judizialari eskatzeko haren zaintzapean daudenak entrega ditzan eskatzeko.

Deklarazio hori titulu nahikoa da Nafarroako Foru Komunitatearen alde Jabetzaren Erregistroan inskribatzeko kausatzaileak bere izenean zituen higiezin edo eskubide errealak. Higiezin edo eskubide errealak lehenagotik inskribatu gabe baldin bazeuden, deklarazioa titulu nahikoa izanen da immatrikulazioa egiteko.

Nafarroako Foru Komunitateko Administrazioaren erantzukizuna, prozedura hauen xede diren ondasun eta eskubideen titulartasuna dela eta, organo judizialak entregatzen dituenean edo haien jabetza egiazkoa hartzen duenean, une horretan hasiko da.

8. Jarauntsiaren egiazko jabetza hartu ondoren, ondare arloko eskumena duen departamentuak haren ondasun eta eskubideen likidazioa eginen du, ordaindutako gastuak eta kalte-ordainak kenduta, baldin badaude. Likidazio hori egiteko prozedura erregelamenduz ezarriko da.

9. Nafarroako Foru Komunitateko Diruzaintzan likidazioaren zenbatekoa sartu ondoren, interes sozialeko beste xede batzuetarako aurrekontuetan dagoen kopuruari gehituko zaio, hain zuzen ere Pertsona Fisikoen Errentaren gaineko zergan xede hori hautatu duten zergadunen kuota osoen baturarekin hornitzen den horri.

## XEDAPEN IRAGANKORRA

**Xedapen iragankor bakarra. Foru lege honek indarra hartzen duenean hasiak diren prozeduretan aplikatu beharreko arauak.**

Nafarroako Foru Komunitatea abintestato jaraunsle deklaratzeko prozedura judizialak, foru lege honek indarra hartu aurretik hasita zeudenak, hasi aurretik aplikatzekoa zen araudiak zuzenduko ditu. Nolanahi ere, foru lege honek indarra hartzen duenean likidatzeko zeuden jaraunsiak eta likidazio horien emaitza diren kopuruen banaketa foru lege honek eta haren erregelamenduzko xedapenek zuzenduko dituzte.

## XEDAPEN INDARGABETZAILEA

## **Xedapen indargabetzaile bakarra. Indarrik gabe uzten diren xedapenak.**

1. Indarrik gabe geratuko dira foru lege honetan xedatutakoari aurka egiten dioten maila bereko edo txikiagoko xedapen guztiak

2. Nafarroako Foru Komunitatearen aldeko legezko oinordetzari aplikatu behar zaion administrazio araubideari buruzko uztailaren 1eko 166/1988 Foru Dekretuak indarrean segituko du foru lege honen kontrakoa ez den guztian, maila bereko beste arau batzuen bidez aldatzen ez den bitartean.

## **AZKEN XEDAPENAK**

**Azken xedapenetan lehena. Foru lege honek gehiengo osoa behar du onetsia izateko.**

Foru lege honek gehiengo osoa behar du onetsia izateko, Nafarroako Foru Eraentza Berrezarri eta Hobetzeari buruzko abuztuaren 10eko 13/1982 Lege Organikoaren 20.2, 45.6 eta 48.2 artikuluen arabera.

**Azken xedapenetan bigarrena. Nafarroako Gobernuari baimena ematea.**

Nafarroako Gobernuak foru lege hau garatu eta betearazteko behar diren erregelamenduzko xedapen guztiak eman ahal izanen ditu.

**Azken xedapenetan hirugarrena. Foru legeak indarra hartzea.**

Foru lege honek indarra hartuko du Nafarroako Aldizkari Ofizialean argitaratu eta biharamunean.

